



欽定四庫全書提要

旅舍備要方一卷宋董汲撰陳振孫書錄解題載有董汲小兒斑疹論脚氣治法不及此書然宋史藝文志載之卷帙亦同蓋陳氏偶未見也汲因客途猝病醫藥難得集經效之方百有餘道內如蚰蜒入耳及中藥毒最爲險急而所用之藥至爲簡易其雜傷五方古書中不少槩見今亦罕傳尤頗見奇特蓋古所謂專門禁方用之則神驗至求其理則和扁有所不能解卽此類也至於小半夏湯五苓散兩方本於漢之張機今以半夏湯治濕痰仍其本法至五苓散本治傷寒汗後不解及有水氣之病今書中引爲通行利水之劑殆亦變通用之

如河間益元散本雙解半表半裏之傷寒而後人取以醫暑歟其治中暑一方似卽李杲清暑益氣湯之藍本其無比香薷散與後來局方稍有出入蓋亦本古方爲加減然云治兩脚轉筋疼痛而反去主治之木瓜則不解其故矣小兒一門大槩與同時錢乙藥証眞訣相出入第以柔脆之腸胃而多用膩粉硃砂諸峻藥古人氣厚服之無妨在後來亦未可槩施也原本久佚今從永樂大典收掇排纂得方尙幾五十仍舊目分爲一十有二類其觸寒心痛厥風涎潮等證有錄無書無從較補則亦闕焉

原序

夫醫藥之來皆原於農黃二帝之書其奧博微妙莫不符契陰陽五行消長之理昭合君臣相與之道則固非庸流俗輩所能鈎索之也推聖人之心蓋深切於蠲疴濟世欲躋天下生靈於壽域而已矣董君及之少服儒術者閱醫經洞徹其簡切應用者近百餘方可以備旅舍應猝之用編目成集共爲一卷號曰旅舍備要方將鏤板以廣其傳君可謂能推究聖人之所存心者哉誠可嘉尙余故輒爲之引云孟震序

自序

汲少小多病因習醫藥常思世人榮辱汨馳喜怒妄作飲食不節興居無常倏忽之間疾起不測迫於倉卒不暇藥餌以斯致困可不惜哉况宦遊南北客涉道途冒觸居多邪氣易入方藥備急尤當究心且如觸寒心痛冒熱中暍厥風涎潮伏暑霍亂急病急治方可安全推類求之不能悉數汲自業醫以來收經效奇方計百餘道證詳而法畧使覽之者曉然可用目之曰旅舍備要方爲一卷庶幾道途疾病治療有歸不敢私隱具錄如左董汲序

旅舍備要方

墨海金壺 子部

宋 董汲 撰

斑疹

神仙紫雪 治大人小兒一切熱毒冒熱發斑消豆疱麩疹及傷寒熱入胃發斑并小兒驚癇涎厥走馬急疳黃瘦喉痺腫痛及瘡疹毒攻咽喉水漿不下

黃金一百兩 寒水石 石膏各三斤 犀角 羚羊角各十

兩元參一斤 沉香 木香 丁香各五兩 甘草八兩

升麻六兩

右咬咀以水五斗煮金至三斗去金入諸藥再煎至一斗瀘去滓投上好芒硝二斤半微火煎以柳木篦攪勿停手

候欲凝入盆中更下研細硃砂真麝香各一兩急攪勻候
冷貯於密器中勿令見風每服一錢溫水化下小兒半錢
一治咽喉危急捻少許乾嚥之

痰證

小半夏湯 治痰逆粥藥不下胸膈不快停痰蓄水手足厥
冷并天行病噫不止

半夏

不計多少湯洗七遍切片焙乾

右每服一錢水一盞半入生薑切片半錢同煎至一盞去
滓溫服若腹鳴有水聲每服加去瓢橋皮去皮茯苓各半
錢煎如上法

半夏化痰丸 治痰實惡心嘔吐頭目昏暈心悸背寒臂病

涎嗽膈不快

半夏

一兩湯洗去滑

赤茯苓

半兩去皮

白礬

一分

鉛白霜

半兩

右為末取生薑自然汁煮麵糊為丸如梧桐子大每服十
五丸生薑湯下

枳實丸 治風痺痰實大便秘澀頭眩暈腹滿煩渴傷寒

胃熱有燥屎譫言狂亂及結胸痛痞癰瘍瘡癩

大黃

半兩

牽牛

微炒取末半兩

枳實

麩炒去瓢

人參

一分

右為末煉蜜為丸如梧桐子大每服三十丸溫水下未動
再加丸數服之

霍亂

論曰陰陽不順清濁相干氣滯中焦石為霍亂也皆由飽食

豚膾復啖乳酪海陸百忌無所不食多飲寒漿眠臥冷席風冷之氣傷於脾胃諸食結而不消陰陽二氣壅而不通陽氣欲升陰氣欲降陰陽交錯變成吐利不已百脈昏亂榮衛俱虛冷入於筋則令轉筋宜服無比香薷散方見後

丸方 治中暑霍亂吐瀉米穀不化臍腹疼痛滑瀉色白脚轉筋手足冷脾胃虛冷不思飲食腹脹不快及胸痺心痛并傷寒陰經受病不壯熱大便清穀脈虛弱而暈及婦人新產內虛

人參

白朮

乾薑

甘草

炙各一兩

右爲細末煉蜜和丸如彈子大每服一丸湯化下日十服吐多利少者取枳實三枚炙四破水三升煮一升和一

丸服 吐少利多者取乾薑一兩水二升煮一升和一丸服 頻吐利乾嘔者取半夏半兩湯洗去滑水二升煮取一升和一丸服 若體疼痛不可堪者水三升煮棗三枚取一升和一丸服 若大吐利轉筋者以韭汁洗腹腎從胸至足踝勿逆卽止 若體冷微汗腹中寒取附子一枚炮去皮四破水二升煮一升和一丸服 吐利悉止脈不出體猶冷者可服諸湯補之

厚朴湯 治霍亂心煩

厚朴

高良薑

桂心

各三兩

右咬咀以水六升煮取三升分再服

龍骨湯 治霍亂吐利嘔逆

龍骨

黃連

乾薑

赤石脂

當歸

各一兩

枳實

五枚

半夏

一升

附子

炮去皮臍

人參

桂心

甘草

炙各二兩

右咬咀以水九升煮取三升分三服

大鼓湯

治氣厥嘔噦不得息又主霍亂

香豉

一升

半夏

洗

生薑

切各二兩

前胡

外臺是柴胡

桂心

外臺無

人參

甘草

炙各一兩

右咬咀以水五升煮取二升分三服勿使冷

外臺云忌羊肉錫海藻菘菜等

又方

治霍亂吐利心煩不止

猪糞如雞子大一枚為末以沸湯一升和之頓服良不

差更服

又方

梁米粉五合水一升半和之如粥頓服須臾即止

又方

治霍亂止吐

丁香十四枚以酒五合煮取二合頓服之用水煮之亦

佳

無比香薷散

治非時霍亂吐利心腹撮痛大渴煩躁四肢

厥逆汗自出兩脚轉筋疼痛

厚朴

去皮二兩

黃連

二兩

二味

入生薑

四兩

香薷穗

半

一兩

右為末每服五錢水酒各一盞同煎至一盞去滓令極冷

頓服之

五苓散 治中暑惡心霍亂吐瀉煩燥飲水又治五淋小便不利臍下脹滿及胞轉不得小便小腹脹痛又治瘴氣瘟瘧不服水土或吐或瀉又治中酒惡心嘔吐痰水有人便吐心下痞悶又治黃疸遍黃橘色心中煩急眼如金小便赤澀或大便自利

猪苓

去黑皮 十八銖 澤瀉 一兩

白朮

十八銖

茯苓

去皮 十八銖

肉桂

去

兩半

右為細末每服二錢溫水冷水隨意調下若治黃疸煎茵

陳湯調下日三服

腰痛

論曰腰痛之為疾大法有四種有腎虛有腎著有腎腰有風

氣下流腎虛者腰膝痛小便淋澀當服八味丸腎著者腰中疼痛如帶五千錢服腎著湯腎腰者腰痛因俛仰腎墮而傷腰當服藥碁子風氣下流者腰痛脚重大便秘澀當服神功丸即愈方如左

藥碁子 治腎腰疼痛氣滯

牽牛

一兩半生半炒 取半兩為末

右研入硫黃末一分再研勻分三分每一分用白麵一二匙以水搜和前藥切作碁子於五更初以水半盞煮熟連湯溫食差即止初服未除隔日再服

神功丸 治三焦氣壅心腹痞悶六腑風熱大便不通津液內枯大腸乾澀裏急後重或下鮮血痰唾稠粘風氣下流腰

脚重臍下脹痛溺赤如金陳無擇三因方云此藥當量虛實加減溫湯溫酒米飲皆可服食後

臨臥服

大黃三兩趙素風科集驗名大腹子人參兩半訶子皮兩麻子仁五兩

研另

右為細末煉蜜為丸如梧桐子大每服二十丸溫水下日三服早起日中晚以通為度

眼

治傷寒時氣後毒攻眼疼痛赤腫方

露蜂房兩半

右以水三盞煎至二盞露一夜溫冷任洗之

瀉肝湯 治肝熱目赤羞明隱痛生瘡翳膜赤腫

黃芩 黃連 防風 梔子仁各一兩 大黃

甘草炙各二兩

右為散每服三錢水一大盞入竹葉十片同煎至八分去滓溫服若入朴硝一錢同煎取利即止勿服

治跋涉風土或道路誤為細塵眯目隱痛不能視物隨所眯目以手分開自以唾搽之即愈

耳

治蚰蜒入耳

膽礬末一匙以醋少許調灌之須臾蟲化為水

口

赴筵散 治心脾勞熱口舌生瘡或赤或白不下飲食

廣土

即赤土

荆芥

朴硝

各一兩

右同研勻新汲水調服一錢小兒少與

又方 治口舌唇吻等瘡

黃蘗

蜜炙一錢

膩粉

麝香

各少許

右研勻貼之日三四易

齒

細辛散 治齒痛齩腫風癢攻槽疼痛不可忍

細辛

去葉

芎藭

香白芷

甘松

各一兩

右為細末每用半錢擦牙痛便止或大痛不定以藥一二錢入好雄黃末半錢生川烏頭末半錢拌勻少少擦之良久以鹽湯漱之

治腎虛髓少齒痛方

生地黄

川芎

各一錢

右為末以漬齒根

又方 治齒痛宣露涎血臭氣

川芎

一錢

竹葉

二十片

鹽

少許

細辛

一錢

右以水三大盞煎兩盞熱含漱冷吐之

治牙齒疼痛腮腫齩痛不能嚙物風蟲疼痛

附子角

八箇

巴豆

一箇去皮

麝香

一箇

右研為末蒸餅水浸為丸如黃米大以綿裹隨痛齒噙之

中毒

解中藥毒并蟲毒悶亂吐血煩躁

甘草

一兩生用

白礬

半兩生

延胡索

一兩

右為細末每服半錢水一盞煎至六分去滓放冷細細呷之

婦人科

萬安丸 治妊娠不足月損動胎不安或悞服藥胎欲下腹

脹痛

知母

一兩

右為末用熟棗肉為丸如彈子大每服一丸以秦艽糯米

湯化下

保安散 治因漏胎胞乾難產橫逆不下

蟬蛻

不計多少燈下燒存性

右入真麝香少許研細臨產時淡醋湯調下半錢

四物湯 治婦人產前後百病崩中血不止及妊娠胎漏下

血腹痛產後宜倍服去宿血養新血療腰脚疼痛

當歸

白芍藥

川芎

熟乾地黄

各一兩

右為散每服三錢水一盞入生薑三片同煎至七分去滓

溫服 若漏胎及崩中每服入炙阿膠二片熟艾半雞子

大同煎 若產後每服入童子小便少許

小兒科

麝香膏

治小兒諸風驚涎寒熱發搐

載幼幼新書

麝香

研

乳香

研

青黛

各半兩

防風

末

硃砂

研

龍膽

各三錢

甘草

炙四兩

龍腦

膩粉

各一錢七

天南星

炮

墨燒各半錢

右研細拌勻蜜劑成膏每二歲兒服半皂子大薄荷湯化下

鈎藤飲 治小兒吐利後藏虛慢驚手足瘈瘲多睡眼上視乳食不進

鈎藤鈎二分

芎藭

白僵蠶

去嘴炒

蟬蛻

去足翅各半兩

蛇皮

甘草

炙各一分

蛻蝦

五枚炙去頭翅足

附子

炮去皮臍半兩

右為末每服二錢水一盞煎至六分去滓溫分三服急驚有熱證去附子不用

定命丹 治小兒急慢驚風天癇臍風撮口搐搦癩癩壯熱

天麻

青黛

各一分半

天南星

炮

膩粉

各一分半

硃砂

研

白附子

炮各半兩

麝香

二錢

蝎尾

十四箇炮

右研細拌勻用燒粟米飯為丸如棗豆大每服一丸薄荷湯化下急驚者水化滴入鼻中啼即搐定

又方 通治小兒急慢驚風手足搐搦日數十發搖頭弄舌

百治百效垂困

已上方並載幼幼新書

蛇蛻皮

一分

牛黃

研一錢

右以水一盞先煎蛇皮至五分去滓調牛黃頓服五歲以上倍服

利毒丸 治小兒瘡疹欲出胃熱發溫氣羸腹滿大小便赤

澀睡中驚煩渴口舌乾手足微冷多睡時嗽涎脈實沉大滑數便宜服之

大黃兩半

膩粉錢炒一

大青錢一

龍腦

硃砂各半

檳榔

生牽牛各一錢半

黃芩

青黛各一錢別

本作二錢

右研細末麵糊為丸如黃米大每二歲兒服八丸生薑蜜水下不動再服量兒大小虛實加減

牛黃散

治小兒瘡疹陽毒入胃便血日夜無節度腹痛啼

哭

已上二方並載幼幼新書

牛黃兩一

鬱金兩一

右研細末每二歲兒服半錢以漿水半盞煎至三分和滓溫服量大小以此增減之日二服

紫草散

治小兒伏熱在胃經暴發豆疱瘡疹一切惡侯出

不快小便赤澀心腹脹滿

錢乙四聖散同

黃土湯

治赤疹瘙痒煩躁昏悶

伏龍肝

即竈下黃土

右研極細每服二錢生薑蜜水調下

救生散

治小兒瘡疹膿疱惡候危困陷下黑色

積豬血

臘月內以新葦罐盛掛於房東上陰乾為末

馬牙硝

研各一兩硃砂

牛黃

腦麝各一錢

右研極細每二歲兒取一錢新汲水調下大便下惡物瘡疱紅色為度不透再服神驗無比

玳瑁散

治小兒瘡疹熱毒內攻紫黑色出不快

生玳瑁

水磨濃汁取一合

積豬心

一箇取中血一皂子大

右合調勻濃煎紫草湯調服

瘡科

論曰大凡瘡腫本自畜熱或因服金石等藥或因父母服熱藥并飲酒消渴人多病此當以涼藥下之故孫真人千金方云病癰疽人如道塗無藥可只以大黃下之者蓋攻其本也近人多不達此意至瘡腫既發而下之使毒內陷者失其旨矣宜切誌之

內治散 治一切癰疽惡瘡毒氣內熏五臟惡心煩躁

菘豆粉

兩一

乳香

分一

右研細末每服一錢新汲水調下

神明膏 治癰疽癩腫毒無頭疼痛或有數頭煩熱氣毒軟癩久不效

五靈脂

不計多少微炒

右為末新水調塗於故緋絹上貼之

論曰大凡傷瘡欲成痂時往往賴看及不時將護多中外風以至背急角弓反張有若痙病之狀皆由風入瘡口傳遍四肢經絡故如是或者便以治賊風之法攻汗此大非也有瘡人慎不可犯水或曰癩時慎不可於風中看但以背指散貼之無不神效若瘡出血多其人必渴宜忍之并不可噉燥食鹽飲酒嗜羹只可食油及脂肥物為佳不惟能禦外風兼可不渴若犯諸忌卽血溢殺人又忌嗔怒大笑思想陰陽行動極宜謹此

背指散 貼一切復瘡血出瘡痛若貼不膿不痛

檳榔

黃連

各一兩

木香

半兩

右為末有傷便貼之如斫下指血未定速將藥裏定便得連接

治打撲腫痛傷折骨節蹉跌脫臼內有瘀血疼痛不可忍

硃砂

定粉

當歸

蘇木

各半兩

右研細末每服一錢熱酒調下痛處熱為效

雜傷

論曰大凡湯火誤傷害人最急始覺熱痛多用冷物沃之以救其熱切不可也蓋火氣本陽得水則陰氣內薄必皮肉膿潰仍久不成痂使陰陽交激微者致極熱氣轉深侵壞筋骨如過傷但以救痛散塗之無不即效

治火傷

被火燒處急向火炙之雖大痛強忍之少間不痛不膿

治犬馬齧及馬骨刺傷人及馬血入舊瘡中方

取灰汁熱漬瘡常令汁器有火數易其汁勿令爛入肉

三數日漬之有腫者炙石令熱熨之日二消即止

治蛇咬久不效及毒氣內攻疼痛方

雄黃

白礬

右等分研就刀頭上爆令鎔便貼咬傷處自瘥

治在道塗大醉仆地或取涼地臥多為蛇入人竅方

見時急以手捻定用刀刻破尾以椒或辛物置破尾上以綿繫之少刻自出此蛇有逆骨慎不可以力拔之須

切記

壁鏡咬人立死治之方

檳榔

不計多少

右燒灰存性先以醋淋洗後以醋調貼之

旅舍備要方終

皇清嘉慶十有三年歲在著雍執徐且月昭文張海鵬較梓

傷寒微旨

欽定四庫全書提要

傷寒微旨二卷宋韓祇和撰是書宋史藝文志不載陳振孫書錄解題載有其名亦不著作者名氏但據序題元祐丙寅知其爲哲宗時人而已今檢永樂大典各卷內此書散見頗多每條悉標韓祇和之名而元戴良九靈山房集亦稱自漢張機著傷寒論晉王叔和宋成無己龐安常宋肱許叔微韓祇和王賓之流皆互有闡發其間祇和姓名與永樂大典相合是祇和實北宋名醫以傷寒爲專門者特宋史方技傳不載其履貫遂不可考且書凡十五篇間附方論大抵皆推闡張機之旨而能變通於其間其可下篇不立湯液惟以早下爲大戒

蓋爲氣質羸弱者言然當以脈證相參知其邪入陽明與否以分汗下不宜矯枉過直竟廢古方至如辨脈篇據傷寒例桂枝下咽陽盛乃斃承氣入胃陰盛乃亡之義以攻楊氏之謬誤可汗篇分陰盛陽虛陽盛陰虛陰陽俱盛三門則俱能師張氏而神明其意矣又如汗下溫三法分按時候辰刻而參之脈理病情乃因張機正傷寒之法而通之於春夏傷寒更通之於冬月傷寒亦頗能察微知著又如以陽黃歸之過下亡津則於金匱發陽發陰之論研析精微不特傷寒之黃切中窾要卽雜病之黃亦可以例推矣其書向惟王好古陰證略例中間引其文而原本久佚今採掇薈粹復成完帙謹依原目釐爲上下二卷陳振孫所稱之原序則永樂大典不載無從採補殆編纂之時舊本已闕歟

傷寒微旨論卷上

墨海金壺 子部

宋 韓 祗 和 撰

傷寒源篇

夫傷寒之病醫者多不審察病之本源但只云病傷寒卽不知其始自陽氣內鬱結而後爲熱病矣自冬至之後一陽漸生陽氣微弱猶未能上行易曰潛龍勿用是也至小寒之後立春以前寒毒殺厲之氣大行時中於人則傳在臟腑其內伏之陽被寒毒所折深夾於骨髓之間應時不得宣暢所感寒氣淺者至春之時伏陽早得發泄則其病輕名曰溫病感寒重者至夏至之後眞陰漸發其伏陽不得停留或遇風寒或因飲食沐浴所傷其骨髓間鬱結者陽氣爲外邪所引方

得發泄伏陽既出肌膚而遇天氣炎熱兩熱相干卽病證多
變名曰熱病按素問生氣通天論云冬傷于寒注云冬寒且
疑春陽氣發寒不爲釋陽怫于中與寒相持故病溫又熱論
云人之傷于寒也則病熱注云寒毒薄于肌膚陽氣不得散
發而內怫結故傷寒者反爲熱病也以此證之卽傷寒之病
本于內伏之陽爲患也傷寒受足經篇云人身有十二經絡
分布上下故手有三陽三陰足有三陽三陰手三陽者太陽
小腸也陽明大腸也少陽三焦也三陰者太陰肺也少陰心
也厥陰心包絡也足三陽者太陽膀胱也陽明胃也少陽膽
也三陰者太陰脾也少陰腎也厥陰肝也今傷寒之病只受
于足三陽三陰者何也熱論云一日巨陽受之頭項痛腰脊

強二日陽明受之陽明主肉故身熱目疼而鼻乾不得臥三
日少陽受之少陽主膽故胸脇痛而耳聾四日太陰受之故
腹滿而咽乾五日少陰受之故口燥舌乾而渴六日厥陰受
之故煩滿囊縮今經中論其傷寒病所傳受而不傳于手之
三陽三陰古今未見其說焉且人之生也稟天地陰陽氣身
半以上同天之陽身半以下同地之陰或四時有不常之氣
陽邪爲病則傷于手經也陰邪爲病則傷于足經也故寒毒
之氣則中于足經矣易云水流濕火就燥是也太陰陽明論
陽受風氣陰受濕氣注云同氣相求爾又曰傷于風者上先
受之傷于濕者下先受之注云陽氣炎上故受風陰氣潤下
故受濕蓋同氣相合爾至真要大論云身半以上其氣三天

傷寒微旨論卷一
二
之分也天氣主之身半以下其氣三地之分也地氣主之注
云當陰之分冷病歸之當陽之分熱病歸之脈要精微論云
故中惡風陽氣受之也以此爲證卽寒毒之氣只受于足之
三陽三陰明矣

傷寒平脈篇

夫傷寒旣稟于冬得春夏之氣則欲發泄而又因飲冷嗜欲
則觸起因衝風雨則迫動因他人病所著則外邪煦出內邪
旣病之後變動不常未見于證先形于脈脈者人之權衡浮
數而軟命之曰傷風浮數而硬命之曰傷寒傷寒之脈陽毒
則頭大尾小陰毒則頭小尾大頭者寸也尾者尺也寸有餘
則爲陽毒尺有餘則爲陰毒三部皆有餘乍小乍大爲往來

未定陽毒盛則解陰毒盛則溫陰陽皆盛則平陰陽皆弱則
扶陰陽未定則待旣久不定然後觀證治傷寒以脈爲先以
證爲後浮者按之便得數者一息六至以上硬者有力凡有
吐瀉當以脈候關前脈大關後脈小或六脈俱大雖吐瀉大
熱之證不得便以爲熱關前脈小關後脈大或六脈俱微雖
秘結大寒之證不可便以爲寒經云關前爲陽關後爲陰

辨脈篇

夫辨傷寒病之脈不出于數種曰浮曰沈曰數曰遲曰陰曰
陽先識此等六脈然後辨盛虛審大小察緊緩爲治病之急
務今之醫流治傷寒病則憑脈浮爲陽脈沈爲陰全不明脈
尺寸有陰陽虛盛之理爲可汗下與不可汗下之規往往變

傷寒爲壞病焉

浮脈者皆謂舉之有餘及按之三四菽重得之也脈有三部有上部有中部有下部凡脈在上部者皆名浮也於傷寒病卽不然但病人兩手脈見之于皮外指到不及按便得者乃是浮也若病在表脈浮不得便以浮爲陽浮中亦有陽亦有陰也蓋三陰病在表脈亦浮也故有可汗者有不可汗者沈脈者非謂深取而得之也若在中部上見卽爲沈矣但兩手脈按之至皮下得者乃是沈也傷寒病在裏三部脈沈不得便以沈脈爲陰沈中亦有陽亦有陰也假令三陽病在裏脈亦沈也故有可下者有不可下者數脈者一息六七至是也病人脈或浮或沈若陰陽氣停脈

雖及六七至只是邪氣傳受不宜妄投藥也若脈及七至已上按之有力卽可投藥解之此陰氣弱陽氣勝也遲脈者一息四至下三至上是也病人脈或浮或沈不以大小緩急但見脈遲便可投藥和之此是陽氣弱陰氣勝也前數脈不投藥者蓋數脈與陽病相應何藥之有今遲脈投藥者乃是遏陰氣而歸于陽也

陽脈者非謂脈浮爲陽也病人兩手脈或浮或沈皆以寸口爲陽也若以在表爲陽古人何以不云病在陽而云病在表也平人氣象論曰寸者陽分位也脈經曰從關至魚際是寸口內陽之所治也又曰關前爲陽也

陰脈者非謂脈沈爲陰也病人兩手脈或浮或沈皆以尺中

傷寒雜論卷上
四
爲陰也若以在裏爲陰古人何以不云病在陰而云病在裏也平人氣象論曰尺者陰分位也脈經曰從關至尺是尺中內陰之所治也又曰關後爲陰也

盛脈者非謂牢實洪滑也是陰陽氣偏勝之名也病人脈或沈或浮不以大小緩緊若寸口力大名曰陽盛尺中力大名曰陰盛也

虛脈者非謂軟微濡弱也是陰陽氣不足之名也病人脈或浮或沈不以大小緩緊若寸口力小名曰陽虛尺中力小名曰陰虛也

大脈者按之指下似洪而極大也病人脈三部力停或在表或在裏按之雖大若不發熱冒悶及口燥咽乾譫語者此是無表裏證不可妄治之治之卽邪毒相攻爲壞病矣

細脈者比常脈小也非微細之細也若病人兩手三部脈力停或在表或在裏其脈按之小或無力雖陰脈先見而證未見便可少投溫藥和之何者蓋欲消陰氣歸於陽也

緊脈者寒也按之指下如繩動而無常是也病人三部脈力停或浮而緊表傷寒也或沈而緊胃中寒也若不惡寒不自汗不胸滿不腹痛勿妄治之此是傷於寒氣而傳受也

緩脈者風也按之指下軟差駛病於遲是也病人三部脈力停或浮而緩表傷風也或沈而緩亦胃中寒也若不惡風不自汗不嘔逆不腹滿亦勿妄治之亦是傷於風而傳受也

前辨脈之法乃是病人始得病三四日以前未經服汗下吐

藥卽依前脈調理免成壞病若病人服汗下吐藥太過變見別脈及有壞病證悉具仲景傷寒之論也

陰陽盛虛篇

凡治傷寒病先辨脈之浮沈次于浮沈中察寸尺之虛盛何謂虛盛病人兩手三部脈或浮或沈關前寸脈小關後尺脈大曰陽虛陰盛關前寸脈大關後尺脈小曰陽盛陰虛今之醫者則不然皆云脈浮爲陽豈可更言陰脈沈爲陰豈可更言陽執此偏見枉陷病人至于不救難經云五十八難曰傷寒有汗出而愈下之而死者有汗出而死下之而愈者何也夫陽虛陰盛汗出而愈下之卽死陽盛陰虛汗出而死下之卽愈楊氏曰此說反倒於義不通不可依用若反此行之大

爲順耳楊氏卽據脈經辨脈陰陽大法云脈有陽盛陰虛陰盛陽虛何謂也曰浮之損小沈之實大故曰陰盛陽虛沈之損小浮之實大故曰陽盛陰虛是陰陽虛實之意也注云陽脈見寸口浮而實大今輕手按之更損減而小故言陽虛重手按之反更實大而沈故言陰實也楊氏曲執此二端爲治傷寒病汗下之法況脈經中立此辨脈陰陽大法蓋總言雜病脈浮之損小沈之實大沈之損小浮之實大爲陰陽虛盛之說非爲傷寒病立言也傷寒病脈浮當以關前爲陽關後爲陰脈沈亦以關前爲陽關後爲陰也假令三部脈浮有可汗者有不可汗者若寸脈短小尺脈實大名曰陰盛陽虛乃可汗之汗之卽愈若寸脈實大尺脈短小名曰陽盛陰虛不

可汗之汗之卽死三部脈沈有可下者有不可下者若寸脈實大尺脈短小亦名曰陽盛陰虛乃可下之下之卽愈若寸脈短小尺脈實大亦曰陰盛陽虛不可下之下之卽死今楊氏執難經正文爲汗下之誤又言文意反倒不可依用由其不通難經中陰陽二字迺是三部脈浮沈中寸爲陽尺爲陰非謂三部脈浮爲陽沈爲陰也使後人妄憑注中之說悞投汗下藥以害人命皆楊氏爲萬世之罪魁也蓋楊氏殊不達聖賢之意自擅己能謬傳於世故也且仲景傷寒例曰桂枝下咽陽盛則斃承氣入胃陰盛乃亡假令脈浮爲陽合投桂枝湯仲景何言陽盛則斃蓋謂三部脈浮寸脈力大關尺脈力小爲陽盛若投桂枝湯足以助陽爲毒是病人必死矣假

令脈沈爲陰合投承氣湯仲景何言陰盛則亡蓋謂三部脈沈寸脈力小關尺脈力大爲陰盛若投承氣湯足以助陰爲毒是病人必亡矣此仲景汗下之戒正與難經陰陽虛盛文意同也則楊氏之失明矣病在表脈浮寸脈力小於關尺此爲陽虛陰盛雖三日以後至四五日亦可投發表藥若寸脈力大于關尺此爲陽盛陰虛雖未滿三日亦不可投發表藥投之則助陽爲逆病人三日以後病猶在表脈浮三部齊等尙不可投汗藥況寸脈力大于關尺耶病在裏脈沈寸脈力大于關尺此爲陽盛陰虛雖四日後亦可下之若四日以前雖有此脈未投下藥亦不爲晚若寸脈力小於關尺此爲陽虛陰盛雖四日至六七日以後亦不可投下藥下之則助陰

爲逆病人四五日以後病傳在裏脈沈三部齊等尙不可投下藥況寸脈力小於關尺耶

治病隨證加減藥篇

夫病證變壞急速者無出於傷寒古人以傷寒爲卒病也古今治傷寒無出於仲景方仲景尙隨證加減藥味量病而投之傷寒論辨太陽證小青龍湯方內若渴去半夏加苴藪根微利若小便不利少腹滿去麻黃加茯苓若喘去麻黃加杏仁又傷寒五六日中風往來寒熱者小柴胡湯方內若胸中煩而不嘔去半夏人參加苴藪根若腹中痛去黃芩加芍藥脇下硬去棗加牡蠣若心下悸小便不利去黃芩加茯苓若不渴外有微熱者去人參加桂枝若欬去人參棗薑加五味

子乾薑又傷寒八九日風濕相搏桂枝附子湯方內若其人
大便硬小便自利去桂枝加朮少許又少陰傷寒病二三日
不已真武湯內若欬加五味細辛乾薑若小便利去茯苓若
下利去芍藥加乾薑若嘔去附子加生薑又霍亂理中丸方
內若臍上築者腎氣動也去朮加桂吐多去朮加生薑下利
多還用朮悸者加茯苓渴欲得水者加朮腹中痛加人參寒
者加乾薑腹滿去朮加附子今據此五方中加減藥味之法
乃是前賢訓誨人之深意也今之醫者見古方中有加減竟
卽依方用之若方中無加減竟不能更張毫釐所謂膠柱也
況素問有異法方宜論豈是執一端而治病也假令雜病方
可用治傷寒病者亦可投之豈須待傷寒論中有法也況古

傷寒微旨論卷一
八
人之心文筆不能盡言者多矣

用藥逆篇

病人若因服下藥太過兩手脈沈細數肢體逆冷煩燥而渴者乃是陽氣下陷入丹田陰氣厥逆滿上二焦故令人躁此名陰躁也醫者見病人煩躁又不詢其端由亦不詳其脈理便用涼藥治之涼藥得下病勢愈甚至於困極不救者多矣病人若因下之太早兩手脈沈遲細而無力或遍身及四肢逆冷煩躁而渴者或引飲不休好泥水中臥者須用性熱藥治之凡投性熱藥皆須冷服何故如是蓋爲病人腹中陰氣太盛若投熱藥湯劑卽陰陽氣相擊藥下必便吐出須候湯劑極冷卽投之投之不吐者以腹中陰氣與冷飲相逢卽同

氣相求爾故藥下不吐也藥雖冷飲久卽必發熱矣所謂始同而終異也素問云醇酒冷飲久必發熱是也假令投仲景四逆湯之類一依前說若病人不煩躁卽熱藥可溫服之病人若傷暑熱胃中空虛飲冷太過遂成泄利日二三十往大便色黃米穀不化渴飲水漿醫者見此證云脾胃不和故至此也投熱藥或止之或補之熱藥旣下往往吐出及下利愈甚此亦陰陽氣相擊也若處承氣湯之類令病人熱飲之藥旣得下必不吐出亦是與胃中熱氣相從也熱力旣消藥冷性得行其病卽愈素問注云以蔥薑和粉藿投之是也

可汗篇

傷寒病有可汗者論中但統言其可汗證及可汗脈或云脈

浮弱或云脈浮而數或云脈浮緊或云脈浮無汗而嘔或云脈浮而在表今略舉數條後人但憑脈之大槩並不分脈浮有陰陽虛盛之理又不分有可汗有不可汗之處悞投發表藥服之則多變成陽毒之患今舉病人有汗惡風無汗發熱分為三等及據立春以後立秋以前氣候輕重各立方治之庶學者易為開悟耳

病人一二日前兩手脈浮數或緩或緊按之差軟寸關尺若齊等雖有頭痛身熱但只是邪氣傳于陽分不可妄投發表藥也

病人雖頭痛惡風身熱若兩手脈寸關尺三部齊等其力不甚大不甚小者亦未可便與解表藥此是見表證未見表脈也直候寸脈力小於關尺方可投解表藥

大抵治傷寒病見證不見脈未可投藥見脈不見證雖少投藥亦無害也

凡治雜病以色為先以脈為後治傷寒以脈為先以證為後病人兩手脈浮數而緊名曰傷寒若關前脈力小關後脈力大惡風不自汗此乃陰氣已盛先見於脈也若不調藥和之後必惡風及自汗出若立春以後至清明以前宜調脈湯主之清明以後至芒種以前宜葛根柴胡湯主之芒種以後及立秋以前宜人參桔梗湯主之

調脈湯

葛根一兩 防風去蘆半兩 前胡去苗三錢 甘草炙半兩

右爲末每服二錢水一盞生薑一塊如棗大劈破煎至七分去滓溫服如寸脈依前力小加棗三箇劈破同煎

葛根柴胡湯

葛根一兩半柴胡一兩芍藥二分桔梗三分甘草三分

右爲末每服二錢水一盞生薑三片煎至七分去滓熱服如寸脈依前力小加葱白三寸同煎服之

人參桔梗湯

人參三分桔梗三分麻黃一分石膏三分甘草三分

右爲末每服二錢水一盞荆芥五穗煎至七分去滓熱服如尺脈依前力小加麻黃二分去節同煎服

病人兩手脈浮數而緩名曰中風若寸脈力小尺脈力大惡

風不自汗此亦陰氣已盛先見於脈也若不調藥和之後必惡風自汗出若立春以後至清明以前宜薄荷湯主之清明以後至芒種以前宜防風湯主之芒種以後立秋以前宜香芎湯主之

薄荷湯

薄荷一兩葛根一兩人參三分甘草二分防風二分

右爲末每服三錢水一盞煎至七分去滓熱服如三五服寸脈力尚小加薄荷二分

防風湯

防風去蘆半兩桔梗三分甘草炙旋覆花各半兩厚朴炒三分

右爲末每服三錢水一盞入薑一塊如棗大劈破煎至七

分去滓熱服如三五服寸脈力尚小加荆芥穗五七枚同

煎

香芎湯

川芎

一分石膏二兩升麻三分甘草半兩厚朴半兩

右為末每服三錢水一盞煎至七分去滓溫服如三五服

後寸脈力尚小加細辛二分

前二段又將中風傷寒各立法者何蓋為病人始得病三日已前因中風脈緩或因傷寒脈緊脈雖先見而病證猶未見尚可用藥解之故各立方爾

病人兩手脈浮數或緊或緩寸脈短及力小於關尺脈者此名陰盛陽虛也若自汗出惡風者是邪氣在表陰氣獨有餘也素問云陰氣有餘而多汗身寒是也即可投消陰助陽發表藥治之若立春以後至清明以前宜六物麻黃湯主之清明以後至芒種以前宜七物柴胡湯主之芒種以後立秋以前宜發表湯主之

六物麻黃湯

麻黃

去節一兩

人參

甘草

各半兩

葛根

蒼朮

各三分

右為末每服三錢水一盞棗二箇煎至七分去滓熱服如三五服已後汗未止加荆芥三分如三五服後不怯風猶自汗出加舶上丁香皮半兩

七物柴胡湯

柴胡

二兩

蒼朮

荆芥穗

甘草

麻黃

去節各一兩

右爲末每服三錢水一盞入薑一塊如棗大劈碎棗三箇
劈破同煎至七分去滓熱服三五服後汗未止猶惡風
者加葱白三寸如三五服汗猶未止加當歸一兩同煎服

發表湯

麻黃去節一兩半 蒼朮三分 人參半兩 當歸去蘆半兩 舶上丁香皮

甘草各三分

右爲末每服三錢水一盞生薑一塊如棗大劈破棗三箇
同煎至七分去滓熱服如三五服後汗未止猶怯風者加
桂枝二分如汗未止更加細辛半兩以汗止爲度

病人脈浮數或緊或緩其脈上出魚際寸脈力大於關尺此
名陽盛陰虛若發熱冒悶口燥咽乾者乃是邪氣在表陽氣

獨有餘也素問云陽氣有餘而身熱無汗是也可投消陽助
陰藥以解表若立春以後至清明以前宜人參湯主之清明
以後至芒種以前宜前胡湯主之芒種以後至立秋以前宜
石膏湯主之

人參湯

人參半兩 石膏二兩 柴胡一兩 芍藥 甘草各三分

右爲末每服三錢水一盞薑三片如錢大同煎至七分去
滓熱服如三五服後依前發熱者每服水一盞半加豆豉
十五粒同煎至八分如前熱未解更加石膏二兩

前胡湯

前胡一兩 石膏二兩 豆豉熬焦三分 桔梗三分 甘草半兩

右爲末每服三錢水一盞薑一塊如棗大劈破同煎至七分去滓熱服依前熱未解每服入豆豉三十粒水一盞半同煎至八分去滓熱服

石膏湯

石膏^{三兩}芍藥^{一兩}柴胡^{一兩}升麻^{一兩}黃芩^{各三}甘草^分

右爲末每服三錢水一盞半入豉一合煎八分去滓熱服如三五服後熱不解加知母一兩如熱未解加大青一兩病人兩手脈浮數或緊或緩三部俱有力無汗惡風者此是陰陽俱有餘素問云陰陽有餘則無汗而寒是也可用藥平之若立春以後至清明以前宜解肌湯主之清明以後至芒種以前宜芍藥湯主之芒種以後至立秋以前宜知母湯主

之

解肌湯

芍藥^{二兩}麻黃^{去節三分}升麻^各甘草^{炙各半兩}

右爲末每服三錢水一盞半入豉半合煎至八分去滓熱服如三五服後猶惡風者加麻黃半兩石膏一兩

芍藥湯

芍藥^{各一}荆芥穗^{各一}石膏^{三兩}甘草^{炙半兩}

右爲末每服三錢水一盞薑一塊劈破同煎至七分去滓熱服如三五服後猶惡風再加棗三箇煎法如前

知母湯

知母^{各一}麻黃^{去節}升麻^{各一}石膏^{二兩}甘草^{一兩半}

右爲末每服三錢水一盞入薑一小塊同煎八分去滓熱服如三五服後猶惡風者加麻黃半兩

仲景云傷寒爲病脈緩者名中風脈緊者爲傷寒蓋始因經冬溫毒毒氣中其人內伏之陽沈潛于骨髓之內每至春夏發時或因外傷寒而引內邪出及乎內邪旣出卽爲病一也故古人立此二端恐後人疑其緊脈與緩脈治法別也若中風與傷寒脈異何故仲景無別法治之此乃後人不究仲景之心也

前二段又將中風與傷寒以一法治之者何蓋病人始得病後脈與證俱見若投解利藥必不能愈故立前方同法治之病人始得病一二日至五六月尙有表脈及表證者亦可依脈證投藥凡投解表及發表藥每一日可飲三服病甚者可至五服外不可頻投藥也如證未解可投熱粥內加葱白亦佳如有汗出勿厚衣蓋覆恐出汗太過作亡陽證

可下篇

傷寒病有可下者論中但統言其可下證及可下脈或云下利三部脈皆平心下硬或云下利脈遲而滑者內實或云脈滑而數者有宿食或云脈沈者內實或云脈滑內疾或云脈浮大按之反濇有宿食或云脈實者今略舉此數說後人但憑其脈之大綱卽不分脈沈有陰陽虛盛之理又不分有可下有不可下之處悞投下藥終則變成四肢逆冷手足拘攣嘔逆喘滿之患

病人四五日以後兩手脈沈數按之不甚實若三部力齊等雖有發熱冒悶只是邪氣傳于內潛在胃脘不可妄投下藥也若投黃芩湯三服以解之即可

病人五六月兩手三部脈沈數大按之不斷寸脈上湧力大于關尺脈此名陽盛陰虛可大小承氣湯以助陰消陽也若腰重口乾譫語項背以上澀然汗出時時潮熱者可服調胃承氣湯若第四五日見此證脈可服小承氣湯

病人三四日以後兩手三部脈沈數寸脈斷力小關尺脈力大此名陰盛陽虛切不可投下藥宜據溫中篇內湯丸投之以助陽消陰也

病人兩手三部脈沈數按之至骨有力而不斷口燥咽乾而渴時時發熱冒悶者此是陰陽氣俱實可用藥和之宜黃芩湯主之

黃芩湯

黃芩 甘草 山梔子 芍藥 厚朴 花粉等分

右為末每服二錢水一盞煎至七分去滓溫服如脈力差軟住服若大便溏去梔子加葛根等分若立春以後立夏以前見證者去梔子芍藥加柴胡去苗等分

病人兩手脈沈數大按之不斷寸脈上湧力大於關尺者此名陽盛陰虛可投藥下之以助陰消陽也若立春以後至清明以前可下者小承氣湯內更加厚朴半兩減大黃一兩主之若發熱譫語引飲者小承氣湯清明以後芒種以前可

傷寒微旨論卷上
下者小承氣湯主之 若發熱冒悶腰重引飲時時譫語大承氣湯芒種以後至立秋以前可下者大承氣湯主之 若發熱煩燥腰重譫語頭面澀然有汗者調胃承氣湯主之凡用大小承氣及調胃承氣並用仲景方

病人立春以後至芒種以前第三四日雖有可下證及有可下脈亦未可便投下藥直候至第五日或第六日投下藥者何蓋天氣陽力尙微慮下之太過變成壞病也若芒種以後立秋以前雖第二三日有可下證及有可下脈亦未可便下之直候至第四五日下之天氣炎盛與胃中熱氣相干雖第四五日投下必不能成後患也

凡投下藥不得務急爲勝假令今日寅時投下藥至申時酉時不動可再投下藥假令今日酉戌時投下藥至來日雞鳴時不動再可投下藥切宜慎守也

病人三四日以前切不宜早下早則多成結胸及四逆之患至十二日以後者見有下證雖脈不至實盛亦宜下之假令第十二三日投下藥之後至十六七日尙口燥咽乾譫語者卽更宜下之何者蓋爲陰病不過六七日乃劇若陽病至十三日以後頻投下藥無害也今立此言者恐醫流將病人日數淺深一槩治也且今太平久矣臟腑柔脆故氣血虛弱但遲投下藥亦無害耳

病人四五日以後假令今日寅時見下證及有可下脈未可便投下藥更候之午未時間陽氣盛再看其脈若比寅時寸

傷寒論中或云按之心下堅腹中滿不大便口燥咽乾汗出
脈力倍大於關尺脈即可下之若與寅時脈力平同即候次
日投下藥亦不爲晚矣凡投下藥者量其脈力輕重證之深
淺不可下之太過若太過則病證多變且古人立論無失下
之過但罪其下之太早及太過爾況病人七八日不大便古
人未嘗罪醫者投下藥之晚此醫之深意思後人全不通曉
病人第五六日兩手三部脈沈數寸關尺力齊等者此乃陰
陽氣停雖然咽乾腰重發熱亦不可投下藥當大便自下爾
病人至六七日不大便若其兩手寸脈小尺中脈大亦不可
下之雖不服下藥而大便者則必先硬而後溏蓋由腹中有
陰氣也仲景論曰先硬後軟不可攻也況鳴溏乎
傷寒論中或云按之心下堅腹中滿不大便口燥咽乾汗出

譎語日晡時發潮熱不能食體重氣促濺然汗出皆是可下
之證雖有此可下之證若三部脈停力弱及寸脈小于關尺
此爲有下證無下脈不可下之毫釐千里直候寸脈力大于
關尺可下也凡投下藥只參酌仲景承氣湯輕重用之
治傷寒病投下藥者本不爲取積及取食止爲疎解陽毒之
氣若邪毒在內陽氣盛即寸脈大乃可下之其陽氣不盛即
三部脈停何必下之蓋今人只知沈在裏便投下藥殊不較
量脈之陰陽虛盛也

凡投下藥者本因胃中有邪熱之氣故投大黃芒硝之類以
消陽氣今之醫者絕不解古人下傷寒之法多投以丸藥丸
藥多用巴豆水銀膩粉粉霜砒霜甘遂石腦油之類皆是熱

傷寒微旨論卷一
藥但能逐其胃中濁惡卽愈增其邪熱矣今用丸藥下傷寒病者欲去胃中積聚胃氣旣虛卽邪熱在內又與熱相逢及吐納暑熱之氣足以助陽爲毒後成壞病也

今人投下藥纔見大便利及三五次急投和氣藥以補之本意用大黃等涼藥疏導胃中熱氣熱氣纔過乘虛之際却投和氣補熱藥決然變成發黃斑出衄血畜血狂走之患矣

凡投下藥候四五日以後有下脈及有可下證卽可下之假令病人不投下藥至六七日大汗後依然腰痛咽乾而渴日晡發熱頰赤胸中冒悶兩手脈實而數宜用黃芩湯一兩服和之直候大汗出後至第五六日投大承氣湯或調胃承氣湯亦無害蓋于汗後至第五六日投下藥者是因病人大病後氣血虛弱不可早下也

前可汗篇別立方藥而不從仲景方今可下篇中不別立藥而從仲景方者何蓋太平之人飲食動作過妄作陽氣多若用大熱藥發表則必變成壞病故斟酌重輕而立方也世人陽氣卽多若用下藥當從至陰藥投之非仲景承氣湯之類卽別藥不能對病矣請醫者深詳之

傷寒微旨論卷上

傷寒微旨論卷下

總汗下篇

凡治傷寒病若能辨其汗下者卽治病之法得其十全矣今之醫者則不然但憑其熱論云未滿三日可汗而已其滿三日者可泄而已又云脈大浮數病爲在表可發其汗脈細沈數病爲在裏卽可下之此古人立理之綱維而今人執之爲定法又全不辨脈尺寸之陰陽邪氣之虛盛及內外證之輕重但未滿三日卽投發表藥已滿四日卽投下藥其間或有辨脈之浮沈投汗下藥者以爲能事矣殊不知未滿三日亦有可下者已滿四日後亦有可汗者又不知脈浮有不可汗者脈沈有不可下者熱論云傷寒一日巨陽受之故頭項痛

腰脊強二日陽明受之陽明主肉故身熱目疼而鼻乾不得臥三日少陽受之少陽主膽故胸脇痛而耳聾三陽經絡皆受其病未入於臟故可汗而已四日太陰受之故腹滿而咽乾五日少陰受之故口燥舌乾而渴六日厥陰受之而囊縮此三陰三陽受病之日乃是聖人立條目之法不必一日巨陽二日陽明爲次也但會三陰三陽所直之日與邪氣相逢各相有形證也假令一日或耳聾或鼻乾或頭痛或腹滿或舌乾而渴或囊縮此是邪氣隨陰陽之經絡所傳也餘日放此

雖見此三陰三陽病證若兩手三部脈或浮或沈寸關尺力齊等者不得妄投發表藥及投下藥當候兩手脈浮沈中或關前大關後小或關前小關後大此是陰陽氣之偏勝卽依脈證投藥治之仲景傷寒論傷寒例云尺寸俱浮太陽受病也尺寸俱長陽明受病也尺寸俱弦少陽受病也尺寸俱沈細者太陰受病也尺寸俱沈者少陰受病也尺寸俱微緩者厥陰受病也此亦是因邪氣傳受三陽三陰之經故見此脈亦不可妄投發表藥及投下藥當候兩手脈浮沈中或關前力小關後力大或關前力大關後力小此亦是陰陽氣之偏勝卽依脈證投藥治之且黃帝作三陽三陰證在前仲景述三陽三陰脈在後本爲邪氣所傳故設此語非務求法治之恐後人悞投藥也今人纔見病人有此三陰三陽病證及脈便急投藥求命則失之遠矣熱論云七日巨陽病衰頭痛少

愈八日陽明病衰身熱少愈九日少陽病衰耳聾微聞十日太陰病衰腹減如故則思飲食十一日少陰病衰渴止不滿舌乾已而噫十二日厥陰病衰囊縮少腹微下大氣皆去病日已矣且傷寒病若見三陽三陰證及脈合用藥調治古人何言大氣皆去病日衰矣卽知是不須用藥妄調治也仲景傷寒論辨太陽證云太陽病頭痛至七日以上自愈者以行其經盡故也又曰十二日厥陰病衰大氣皆去病人精神爽慧矣且素問經中黃帝與岐伯問答病證莫知其數皆各立法治之惟熱論中傷寒病最爲大疾却至七日太陽病衰又云大氣皆去若是傷寒病須用法調治卽聖賢皆不言自愈也今之醫者纔見人病傷寒多不辨脈之理趣又不分證之是非便妄投藥以調治往往變成壞病至於橫天誠可傷也傷寒病稱可汗者非謂病人三日以前也蓋謂邪氣在表或陰氣勝於陽氣卽寸口脈力小於關尺令人惡風或自汗出卽可投發表藥以助陽消陰若陽氣勝於陰氣卽寸口脈力大於關尺令人發熱冒悶可投解表藥以助陰消陽非謂求汗出爲愈若邪氣在表脈浮三部力齊等惡風不汗出不冒悶發熱又何必投發表及解表藥也

傷寒病稱可下者非謂病人第四日以後也但見邪氣在裏伏於胃中或陽氣勝於陰氣卽寸脈力大於關尺令人口燥咽乾腰重發熱甚至於譫語可投大黃等藥以助陰消陽若邪在裏陰氣勝於陽氣卽寸脈力小於關尺令人胸滿悶時

或嘔吐可投溫中藥以助陽消陰不可求取積爲愈若邪氣在裏脈沈三部力齊等不譴語不口燥咽乾不胸腹滿悶又何必投藥下之及溫中藥也

世人爲見素問云三日以前可汗四日以下可下乃執爲定法今深戒醫流不可將病人三日以前妄投汗藥四日以後妄投下藥切宜慎守仲景云發汗吐下之相反其禍至速信矣且古之聖賢立汗下二字本謂調解陰陽偏勝之氣而今醫者執汗下二字妄爲主治傷寒求愈之功則失之遠矣況仲景治傷寒病未嘗有失汗下之戒失下之過但責其下之太早耳此仲景之心也後人或各擅家技或自恃己能殊不究仲景心萬分之一誠可罪焉

辨汗下藥力輕重篇

凡醫者治傷寒病遇其邪氣在裏並不分邪氣之輕重脈理之虛盛只憑脈浮便將發表藥一例投之務期汗多爲快藥力過劑遂致衄血吐血發斑汗漏四肢拘攣因成亡陽之患也

病人無汗發熱三部脈浮寸脈大於關尺者此是陽盛陽邪旣盛若入於胃中卽變成瘵熱之患當用解表藥以消陽氣解表藥者石膏甘草芍藥生薑豆豉薄荷柴胡葛根之類是也

病人汗出惡風脈浮見陰盛者可投發表藥消陰氣發表藥者桂枝麻黃荊芥藜蘆當歸附子乾薑之類是也但不可全

用桂枝耳

凡發表藥只要消解陰勝之氣不務汗多爲法若汗出太過則成亡陽之病仲景桂枝湯證云令遍身絳絳然微似有汗不可如水流漓今既見可汗證當發表藥古人何故却云汗不可如水流足知發表藥不謂汗多爲愈也

凡醫者治傷寒病遇其邪氣在裏並不分邪氣之輕重脈理之虛盛只憑脈沈便將下藥一例投之務期大便快利爲法既過劑遂成噫噦嘔吐四肢逆冷及拘攣之患

病人發熱冒悶或譫語脈見陽盛者可投下藥以消陽氣陽氣既消則無忽變之證消陽藥者大黃芒硝梔子甘草枳實之類是也如用大黃芒硝須用少兼厚朴以和之若一服未中再服之不可務期快利切宜慎守也

凡投下藥只要消陽毒之氣不務取積爲快今既見可下證古人何故却罪下之太早及太過足知不務快利爲法也今立此篇較量藥力輕重者蓋謂醫流執守古方不能隨形證淺深增減藥味也若能辨藥輕重隨證用藥何慮太過不及之責也葛氏肘後篇曰傷寒有數種初覺作葱豉湯頓服取汗如不汗加葛根升麻更作加麻黃豉湯以此較之卽古人豈一端而治病故具輕重出此篇以明之

溫中篇

夫傷寒病之說始黃帝以開其端由至於仲景方陳其條目自後膚淺之學莫知其數立言者只云病在表可發汗病在

裏可下之或云不可汗或云不可下未嘗有溫中之說仲景傷寒論云尺寸俱沈細太陰受病也尺寸俱沈少陰受病也尺寸俱微緩厥陰受病也又辨太陰證云病脈浮可發汗宜桂枝湯又自利不渴宜四逆湯又腸滿時痛桂枝加芍藥湯辨少陰證云少陰病始得之發熱脈沈麻黃附子細辛湯少陰證二三日麻黃附子甘草湯又少陰病身體痛手足寒骨節痛脈沈附子湯又少陰病吐利手足逆冷煩躁欲死吳茱萸黃湯又少陰病脈沈急溫之宜四逆湯今舉仲景論中數條最是治三陰病之良法於今世之用尚有未盡證者愚嘗校讎自至和初歲迄于今三十餘年不以歲之太過不及每夏至前以有病傷寒人十中七八兩手脈俱沈細數多是胸臆

滿悶或嘔吐或氣塞或腹鳴或腹痛與仲景三陰病之說脈理同而證不同因不敢妄投仲景治三陰病藥醫者纔見脈沈及胸膈滿便投藥下之往往不救嘗斟酌仲景理中丸與服之其病勢輕者卽胸中便快其病勢重者半日許悶依然或有病人脈沈細遲故仲景四逆湯溫之多藥力太熱後必發煩躁因較量此形證今別立方以治之多得對病不可不傳焉

按王好古陰證略例云此一條非四逆熱而不當也仲景當漢末韓氏當宋隆時勢異也

病人但兩手脈細數或有力或無力或關脈短及小者胸中膈塞悶氣不能相接者便可隨證與脈投溫中藥以治之

按王

好古云此一條法甚活

病人兩手脈沈遲或緩或緊皆是胃中寒也若寸脈短及力

傷寒微旨論卷下
小子關尺脈者此是陰盛陽虛也或胸膈滿悶腹中脹痛身體俱急手足逆冷急宜溫之若立春以後至清明以前宜溫中湯主之清明以後至芒種以前宜橘皮湯主之芒種以後至立秋以前宜七物理中丸主之

溫中湯

舶上丁香皮 厚朴各一兩 乾薑 白朮 陳皮 丁香

枝各二分

右爲末每服二錢水一盞入葱白三寸荆芥五穗煎至七分去滓熱服如三服未快及手足逆冷嘔吐更加舶上丁香皮二分乾薑一分炮

橘皮湯

陳皮 厚朴各一兩 藿香三分 白朮 葛根各二分

右爲末每服二錢水一盞入薑一塊如棗大劈破同煎至七分去滓熱服如三兩服後未快手足逆冷嘔吐不止加半夏三分丁香枝半兩加葱白三寸同煎熱服

七物理中丸

人參三分 生薑屑二兩 藿香三分 白朮二兩 桔梗三分 葛根二分

右爲細末煉蜜丸如彈子大每服一丸水一盞煎至七分和滓熱服如兩三服後未快及手足逆冷嘔吐加半夏二分乾薑二分炮

病人兩手脈沈細無力雖三部脈力停亦是陰氣盛也更不須候寸脈短治之或胸膈痛身體拘急疼痛手足逆冷宜用

溫中藥和之按王好古云此一條不須候寸脈短一若立春

以後至清明以前宜厚朴湯主之清明以後至芒種以前宜

白朮湯主之芒種以後至立秋以前宜橘葉湯主之按王好古陰證

略例云此一係李思訓舉和解因時一說與韓氏相似然湯液仲景四時之法固已備矣以其後人不識故韓李為是丁寧也此亦大槩耳若應見違時只可隨應見而治之海藏云仲景既言春為溫病夏為熱病長夏為大熱病隨經之藥加減輕重便為因時和解也至治應用便定藥却是不應時也藥是時然矣證復違時定藥難用若用定藥却是若歲之客假司令立春清明芒種立秋即歲之主氣也定時也若歲之客氣司天在泉太過不及勝復淫至而不氣也定時也若歲之客時為則邪主氣為病則只論主氣客氣為病則只論客氣主客相勝上下相召有萬不同之變人之稟受虛實亦猶是也以此言之則仲景六經之言盡矣但患時氣醫者不知耳此亞聖言簡而意有餘也後之賢者辭多而意少務救一時之弊此韓李為是因時一法也噫二公雖不足為漢之仲景亦設非敢為仲景別立一法也噫二公雖不足為漢之仲景亦足以為今之仲景也

厚朴湯

當歸 丁香枝 厚朴 甘草 乾薑各半 細辛一分

參三分

右為末煉蜜為丸如彈子大每服一丸水一盞煎至七分

和滓熱服如三五服後脈尚細及寸脈未為力加葱白三

寸同煎按王好古陰證略例云此一條言寸脈小者陽不及九天也加葱以通經

白朮湯

白朮 半夏 當歸 厚朴 生薑屑各半 舶上丁香

皮三分

右為末每服二錢水一盞入生薑一塊如棗大劈破同煎

至七分去滓熱服如三五服後未有力及寸脈力尚小加

細辛半兩葱白三寸同煎服

橘葉湯

橘葉 半夏 厚朴各半兩 藿香 葛根

右為末每服三錢水一盞入薑一塊如棗大劈破同煎至七分去滓熱服如三五服後脈力尙小手足通冷加細辛

三分

病人胸膈滿悶時時嘔逆支節疼兩脇下痛腹中鳴此是停飲宜二苓湯主之

二苓湯

赤苓 豬苓 白朮 桂枝各半兩 滑石一兩 白豆仁 通草各一分 丁香皮三分 陳皮三分

右為末每服三錢水一盞煎至七分去滓熱服小便未快

加瞿麥三分嘔未止加半夏半兩寒甚加蔥白三寸按王好古

云此與李思訓調小便例同

病人八九日後服汗下藥太過兩手脈沈細而無力好踈足臥多惡明與人聲身有粟起時時發戰一如瘡證宜羊肉湯主之

羊肉湯

當歸 牡蠣 芍藥各一兩 龍骨半兩 桂枝去皮二分 黑附子二箇

每箇五錢重泡去皮臍

右杵為粗末每服用末二兩羊膷肉四兩生薑二兩蔥白五寸同剉爛以水五升同熬至二升半以來淨絞去滓分

作三蓋服

病人服藥胸中滿者此是上焦有陽也或藥力太過上焦覺氣熱腹滿虛鳴時時疝痛此是被陽藥消逐上焦陰氣併入下焦也雖是下焦積寒今上焦陽盛更難投温下焦藥也當用炭灰或桑柴灰二三升許入好醋拌和乾濕得所於鉢內炒令灰熱以帛包裹置臍下熨之頻換灰包常令熱以腹不痛為度或初用灰熨病人不肯受者勿聽但令極熨之勿住灰包如因灰包熨後得下利一兩行或小便二三升或微有汗此是陰氣外出或下泄也當勿疑之病輕者乃得痊愈病人三部脈沈寸脈力小於關尺為陰盛當投温中藥以消陰氣温中藥者厚朴橘皮人參白朮藿香當歸乾薑細辛之

類是也

按王好古陰證略例海藏云霜露山嵐雨滋霜霧之氣而飲冷寸口脈小同證一法神木湯復舉此韓氏

三部脈沈寸口小於關尺為證一體病人若因服下藥入過兩手脈沈細數肢體並冷煩躁而渴者此是陽氣下陷入丹田陰氣厥逆滿上二焦故令人躁此名陰躁也醫者見病人煩躁又不詢其端由亦不詳其脈理便用涼藥治之涼藥既下病勢愈甚至于困極不救者多矣凡投性熱藥皆須兩手脈沈遲細而無力或遍身及四肢逆冷煩躁而渴或引飲不休好泥水中臥者須用性熱藥治之凡投性熱藥皆須冷服何故如是蓋為病人腹中陰氣太盛若投熱藥湯劑即陰陽相爭藥下即吐須候湯劑極冷即投之投之不吐者以腹中陰氣與冷飲相類而終異也故醇酒冷飲久即發熱可令久則必熱逆所謂始類一依前說若病人不煩躁即熱藥可温服之如躁渴引飲不休雖傷冷只好飲冷同意此一條本伏陽脈也叔和云短脈陰中有伏陽乃陽氣下陷而躁即同有伏陽則可若脈已虛按之全無力或病人素無所養只可温服不然陰氣必不能醞釀回陽利害非輕

小便大便篇

治傷寒病常調解病人小便流利及色不黃赤最為醫之大要也

病人二三日以後頻體問病人無令小便黃赤色及淋瀝纔似小便少及黃色即據證便投藥以調治之切勿令凝滯也病人邪熱積於胃中又遇天氣炎盛內外熱氣相干併走於下焦流下入膀胱為熱所結即滲漉過遲故小便因而色黃赤及澀少也若熱發甚則藥力愈難通也傷寒論曰熱結膀胱其人如狂病人小便色或變黃雖未赤澀便可投瞿麥湯日二三服亦無害也

凡治病傷寒常令放行小便勿令放行大便況小便難導也而大便易導也假令陽明病胃中熱實止不過調胃承氣湯投之藥既得下泄去熱毒之氣不為難也假令小便凝滯若證輕尚慮快藥之勿及況證重乎此乃傷寒要妙之門不可不思之況古人無失下之過無禁小便之法何今人不究其深趣也

瞿麥湯治病人二三日以後至未大汗以前若小便黃色者

瞿麥 扁蓄 豬苓 黃芩 茯苓 木通

石 甘草 通草

三錢 一錢

右為末每服三錢水一盞同煎至八分去滓放溫涼時乃服若覺渴或發熱加菰蘆根一兩若小便赤色加黃芩半兩若小便少加車前子三分若小便澀如淋莖中痛者加石葦半兩冬葵子三分續隨子半兩若臍下悸動加茯苓

半兩桂枝半兩並依前法服

七物調中丸

白朮

乾薑

炮各一兩

人參

一兩

厚朴

舶上丁香皮

各半兩

右杵爲末煉蜜和丸如彈子大每服一丸水一盞棗二箇劈破煎至六分去滓早服

六物瀉心湯

黃連

半夏

各一兩

甜葶藶

炒

杏仁

乾薑

各半兩

栝萆實

剉如泥一枚

右剉如豆大合一處分作六服水三盞煎至一盞半淨紐去滓放溫作兩次相續服如半日胸中未快及未通利再投之再煎藥成傾在碗入芒硝末三錢攪勻去滓溫服取其快利也

其快利也

茯苓陷胸湯

茯苓

黃連

各一兩

冬葵子

續隨子

各一分

大黃

杏仁

各半兩

右剉如豆大合一處每服半兩水二盞煎至一盞淨紐去滓溫服如半日許未快利更投一服以胸中快及下利爲度病人二三日兩脈沈數微瀉寸脈不甚浮大胸腹滿悶按之不痛宜服厚朴瀉心湯

厚朴瀉心湯

半夏

一兩半

黃連

厚朴

各一兩

乾薑

白朮

各二兩

人參

三分

右剉如豆大分作八服每服水二盞半生薑二分切爲片

同煎至一盞半去滓放溫兩次服如半日許未得利再一服

畜血證篇

傷寒病有畜血證自仲景立法之後醫流未嘗有信其言者逮仁宗朝采仲景法以治傷寒其間遇病有畜血證用仲景法治之若與證相當卽病無不愈病人或太陽或陽明證至六七日或表證未解或狂或飢或喜或妄或不大便此乃瘀熱走於下焦因而畜成積血及令小腹滿也傷寒論云太陽病不解熱結膀胱其人如狂宜桃仁承氣湯又論太陽病其人發狂者以熱在下焦少腹當鞭滿小便自利瘀熱在裏故也抵當湯主之太陽病身黃脈沈結少腹鞭小便自利其人

如狂者血證諦也抵當湯主之又傷寒有熱小腹滿悶應小便不利今反利者爲有血也宜抵當湯又陽明證其人喜妄者必有畜血屎雖鞭大便反易其色必黑宜抵當湯下之又病人無表裏證發熱至七八日熱則消穀善飢至六七日不大便者有瘀血宜抵當湯主之仲景立此數方治畜血而云小便自利乃血證諦也病人本因瘀熱結在膀胱卽小便不利但血逢瘀熱淖溢而併走於下遂積聚於下焦血積旣多陽氣乃極極則必反陽氣旣消陰乃來復血遇陰氣凝結如豚肝其血常冷膀胱爲冷血所冰乃滲漉易過卽小便自利也故仲景曰小便自利血證諦也

病人有畜血證若現餘證而小便未利是陽氣尙盛而血未

足也卽未可便投湯丸治之候小便利乃可投藥 凡治畜血證抵當湯丸方中皆用蟪蟲水蛭及桃仁之類盡是破血藥若非此藥則不能下之今之用者往往投之太過蓋爲不審其病之輕重與其人之老少強弱也如遇畜血證與仲景方對卽可全用其法治之若病勢少輕人又老弱做做抵當湯丸別用破血藥治之亦可知此變通庶免後患 熙寧五年壬子長安縣君李氏年六十餘自來瘦弱患傷寒病至第九日變成畜血來召及到診之兩手脈沈遲細力微膚冷小腹滿昏迷不省人事再三詢其所由來其主病者云自得病後服發汗藥至第六日喜妄發狂至第八日身體冷臍下滿昏迷失次旣得此言知爲畜血證矣又問病人曾遺小便否曰病後小便常不利愚甚疑之因用紙針內其兩鼻中遂噓數聲及令驗之小便已自利余謂向來小便不利者因其年老氣弱不能降下也若端坐候小便自利不以法驗之豈不後時耶但血雖積聚日多若投仲景抵當湯丸慮藥勢太過血下之後尙有藥之餘力因而損壞臟腑變成血痢大爲後患愚因別立地黃湯主之連投之其血大下次日乃愈 元豐四年辛酉親戚孫氏妊娠第八月患傷寒至第五六日熱極第七日墮胎不及半日惡露遂絕至中夜臍下滿喜妄譫語至次日兩手脈沈細數膚冷小便自利此畜血證具也但病人年少血氣充盛又因產畜血深慮仲景抵當湯力薄別處生漆湯令服三次共服藥一升半其血乃下病遂愈今之

醫者治畜血病依仲景方投抵當湯丸若病熱輕及病人年老氣弱其血大下之後病雖得愈往往下血不止何況太平之人五臟柔脆若不任蟲蟲水蛭之藥非仲景藥之過也乃醫者不審其時代又不量病人之強弱也若參酌其病能倣倣抵當湯丸方別立藥治之即免病人後患矣今人纔見畜血將謂不可調治即將抵當湯丸倍增而投之或連綿而投之畜血雖出而蟲蟲水蛭勢力未盡遂損壞腸胃日夕疴痛下血不止至于不救者十中八九矣醫者既見病人下血云是臟毒尚不知自己投藥太過之罪也又盛衰論篇云診有十度形度脈度臟度肉度筋度俞度陰陽氣血人病自具注云診備盡陰陽虛盛之理則人病自知之又五常政大論篇云大毒治病十去其六常毒治病十去其七小毒治病十去其八無毒治病十去其九無使過之傷其正也若醫者能參酌藥力量病投之乃為良工矣

病人七八日以後兩手脈沈遲細微膚冷臍下滿或喜或妄或狂躁大便實而色黑小便自利者此畜血證也若年老及年少氣血虛弱者宜地黃湯主之

地黃湯

生地黃

自然汁一升或末二兩重

生藕

自然汁如無用小薊汁半升如無用小薊末一兩 蟲

蟲 二十箇去足

桃仁 各半兩

藍葉 一握切令乾作末

水蛭 十箇麩炒乾

漆 炒烟

大黃 一兩判如散子大

右藥入水三升半慢火熬及二升以來放冷分二服投一

傷寒微旨論卷下
服至半日許血未下再投之此比抵當湯丸力勢甚輕如
無地黃與藕汁計升數添水同煎

病人七八日後兩手脈沈細而數或關前脈力大臍下滿或
狂走或喜妄或譫語者不大便小便自利若病人年少氣實
血凝難下恐抵當湯丸力不能及之宜生漆湯主之

生漆湯

生地黃

汁一升如無用三兩半

大黃

二兩

犀角

半兩

桃仁

三十箇

右藥用水三升好酒一升慢火熬及三升以來傾出濾去
滓再入鍋內點生光漆一兩半再熬至二升卽住火淨濾
去滓分作三服每投一服候半日許血未下再投一服候
血下卽止後服如無生地黃汁更添水一升同煎

陰黃證篇

傷寒病發黃者古今皆爲陽證治之往往投大黃梔子蘘皮
黃連茵陳之類亦未嘗得十全愚每于懷衛二郡間其病傷
寒人有黃證風俗相傳多以新汲水浴之其病有愈者有不
愈者又於邢磁二郡間病傷寒人有黃證風俗相傳以熱湯
浴之或以湯漬布搭其胸腹或以湯盛瓢中坐在臍下熨之
其病亦有愈者有不愈者其醫流莫能知其不愈之故見此
二端愚深惑之且黃病旣爲陽證何故以湯浴之旣有得愈
者豈不謂治黃病有證者乎嘗遍討諸醫書並無熱藥治黃
病及無治陰黃法且仲景治傷寒論辨陽明病脈者傷寒發
汗已身目爲黃所以然者寒濕在裏不解故也不可以下之

於寒濕中求之仲景只云於寒濕中求之卽不曾別立方藥後有傷寒類要治黃疸門中夫熱發黃已久變成桃花色心下有堅嘔逆不下飲食小便極赤少四肢逆冷脈深沈極微細遲者不宜服茵陳湯使下必變噦也宜與大茵陳湯除大黃與生地黃五兩服湯盡消息看脈小浮出形小見不甚沈微便可治也脈浮見者黃當明不復桃花色浮指下自覺也此類要中但只云脈浮大可治脈沈細不可治又於本卷治陰黃門中病源陰黃候陽氣伏陰氣盛熱毒加之故身面色黃頭疼而不發熱者名爲陰黃也論中雖稱陽伏陰盛卽可服茵陳散方內却用茵陳大黃梔子黃連紫雪之類亦皆寒藥却與本病相違且陰黃者乃心病也心火爲濕所折卽遍身發黃與傷寒黃病異矣傷寒病發黃本自脾弱水來凌犯又胃中空虛而變爲黃是與陰黃不同耳病人始於二三日務求汗下爲勝或服發汗溫中藥太過加以厚衣蓋覆仍於陰濕不通風處坐臥或以火劫之變爲黃病此乃陽黃也當投寒藥以治之藥證付景論中悉具

病人三五日後服下藥太過虛其脾胃亡津液引水漿脾土爲陰濕加之又與暑相會至第六七日變爲黃病此乃陰黃也當投湯藥治之治法具在後說

病人六七日兩手脈沈遲細微肢體逆冷皮有粟起時或嘔吐舌上白胎身發黃煩躁欲於泥水中臥小便赤少醫者見病人黃生更不審察脈理便投寒藥其病愈甚愚因而別撰

成治陰黃病證并方六七首凡十餘年不逢病陰黃者自疑無憑 元豐二年己未六月中淦陽人趙宗顏病傷寒至六七日發黃來召及到診之其脈沈細遲無力皮膚涼發躁欲於泥中臥喘嘔小便澀再三問病人曰得非服下藥太過乎病人曰然才見此深喜之此乃陰黃也先投茵陳橘皮湯不及劑喘嘔止次日投小茵陳湯半劑脈微出不欲於泥水中臥次日又投茵陳附子湯半劑四肢發熱小便二三升當日中午大汗 元豐五年壬戌五月中淦陽趙垣秀才病傷寒亦是醫者投下藥太早及投解利涼藥過劑至六七日轉發黃病至第七日來召及到診之兩手寸脈不見關尺脈沈遲細微腹滿小便澀四肢遍身冷面如桃花一身盡黃先投茵陳茯苓湯半劑小便得利次服茵陳四逆湯脈出四肢熱目中黃先退次日大汗當年似此證者十餘人不能一一寫錄愚向日所思陰黃病處方六首初慮不能用今既治數人皆得中病不可不傳焉

傷寒病嘗校之每遇太陰或太陽司天歲若下之太過往往變成陰黃何故如是蓋因辰戌歲太陽寒水司天寒化太過即水來犯土丑未歲太陰濕土司天土氣不及即脾氣虛弱又水來凌犯多變斯證也醫者宜審察之

茵陳茯苓湯治病人五六日脈沈細微身温四肢冷小便不利煩躁而渴者

茯苓 桂枝 各一兩
 豬苓 三分
 滑石 一分
 茵陳蒿 二兩

右為末水四升煮取二升去滓放溫分作四服如脈未出加當歸半兩

茵陳橘皮湯治病人脈沈細數身熱手足寒喘嘔煩躁不渴者

橘皮 生薑 各一兩 半夏 茯苓 各半兩 白朮 一分 茵陳蒿 一兩

右為末水四升煮取二升去滓放溫分為四服

小茵陳湯治病人脈沈細遲四肢及遍身冷

附子 一箇破作八片 甘草 一兩 茵陳蒿 二兩

右杵為細末水二升煮取一升半去滓放溫分作三服

茵陳四逆湯治病人脈沈細遲肢體逆冷腰以上自汗出

甘草 茵陳蒿 二兩 乾薑 一兩 附子 一箇破作八片

右杵為細末水四升煮取二升去滓放溫分作四服

茵陳附子湯治病人服茵陳四逆湯身如冷汗出不止者

附子 一箇破作八片 乾薑 一兩 茵陳蒿 一兩

右為細末水二大升煎取一升半去滓放溫分作三服

茵陳茱萸湯治病人服附子湯證尚未退及脈浮者

吳茱萸 木通 各一兩 乾薑 茵陳 各一兩 當歸 三分 附子 一箇

破八片

右為末水四升煎取二升去滓放溫分作三服

勞復證篇

傷寒病大汗後餘熱未盡或飲酒或食肉或吃熱食太過與熱毒相逢便成勞復之患熱論篇云熱病已愈時有所遺者

何也岐伯曰諸道者熱甚而強食故有所遺若此者皆病已衰而熱有所藏因其穀氣相薄兩熱相合故有所遺也帝曰治遺柰何岐伯曰視其虛實調其逆從可使必已矣又岐伯曰病熱少愈食肉則復多食則遺此其禁也注云是所謂戒食勞也熱雖少愈猶未盡除脾胃氣虛未能消化內堅食駐故熱復生復謂復舊病也仲景傷寒論大病差後勞復者枳實梔子湯又傷寒差已後更發熱小柴胡湯主之脈浮以汗解之脈沈實以下解之又大病差後喜唾久而不了了胸上有寒當丸藥溫之宜理中丸

病人大病差後勞復者多是因熱所致卽再成傳汗之疾其間有胃中寒者只可與溫中藥卽更不傳汗也溫中藥者何用溫中篇內七物理中丸溫中湯可也

病人大病後勞復者纔二三日以後脈沈實若寸脈差大於關尺脈或寸關尺脈三部力停皆可下之況勞復病只有失下並無下之太早亦無下之太過何者蓋胃中有痰熱在也更與熱飲食相合若下之晚及下藥力少時雖得汗汗罷成勞復至于三四發也

病人二三日以後服下藥畢至第八九日未汗纔見有證卽便宜下之不可後時也凡治勞復患投下藥不得與傷寒初受病人一法治之也

病人若因飲食所勞復傷至第二三日兩手脈沈實有力或寸脈力大於關尺脈或胸已上澀然汗出者當急下之宜大

承氣湯如一服下利未快即再作調胃承氣湯服之並用仲
景方

病人勞復三四日以後兩手脈沈數大有力或發熱煩躁咽
乾而渴或面塵齒垢或目中及遍身皆發黃者宜丹砂丸主
之

丹砂丸

丹砂水飛過馬牙硝各半兩砂石一兩麥門冬去心犀角各三錢金

箔方寸許三十片牛黃一錢

右合研勻用濕紙裹爛粳米飯於澆火內燒紙乾為度和
前藥丸如彈子大每服一丸砂糖水化下如黃甚者煎茅
根湯放冷入砂糖一塊如棗大同化下如黃未退來日再

服之

病人用承氣湯下之後至四五日兩手脈沈數有力或潮熱
或譫語者更宜下之或再投承氣湯又胃中若不甚實宜用
丹砂散下之

丹砂散

丹砂一粒膩粉一錢氣弱年

右合研勻用桃柳心共一把許細切研爛紐取自然汁入
砂糖一塊如棗大更入新汲水通前成半盞化前藥下之
如經一晝夜不利動再作服之此藥奇妙不得與尋常下
藥為比也如冬月無桃枝柳條用生地黃一兩剉碎水一
升煎取半升化藥服 凡中諸藥毒者用新銅錢一箇口

內含之一二時辰許如錢色黑是中毒驗也用丹砂一粒
膩粉一錢砂糖一塊如棗大同研勻以藍葉取自然汁化
下日一服重者不過三服當下血如豚肝也如無藍葉汁
只用藍葉末三錢匕入在藥內以東流河水同調下 凡
小兒陽癇潮搐涎盛及角弓反張者量大小每用丹砂丸
一粒分作三服只用砂糖水化下如要利動每服入膩粉
量少許同化下此藥極有神效今特錄示諸病於此者恐
醫流悞治傷寒汗下畜血黃病及勞復也

傷寒微旨論卷下終

皇清嘉慶十有三年歲在著雍執徐陽月昭文張海鵬較梓

